

թիւնների մտել, անգամ որոշ խոստումներ տուել, սակայն միութիւնը երբեք գլուխ չէր եկել: Դրա համար հարկաւոր էին բոլորովին այլ միջոցներ, որ անշուշտ նոյնպէս լաւ գիտէր ժամանակի աչքի ընկնող հայ հոգեւորականը:

Որ Ստեփաննոս Մարմատեցու առաքելութիւնը գերազանցօրէն քաղաքական նպատակ ունէր — այդ մասին պատմական փաստերը ոչ մի կասկած չեն թողնում: Կրօնական մեթոտեցումը, այո՛, մի պատրուակ էր միայն՝ քաղաքական բանակցութիւնների համար նըպաստաւոր հող ստեղծելու եւ ուրիշ ոչինչ: Եթէ այդ այդպէս չլինէր, հապա ի՞նչ գործ ունէր Ստեփաննոս կաթողիկոսը Եւրոպայի գանազան արքունիքներում: Ինչպէս երեւում է՝ Հոովմից յուսախարուած, Հայաստանի փրկութիւնը նա փորձում է որոնել Արեւմուտքի աշխարհական վեհապետների մօտ: Ուստի Հոովմից գնում է Գերմանիա, լինում է Կարլոս Ե. կայսեր մօտ. այնտեղից անցնում է Լեհաստան, յետոյ Ռուսաստան եւ դատարկաձեռն վերադառնում է Էջմիածին:

Եւ վերջապէս, մենք ունինք պատմական մի գեղեցիկ փաստաթուղթ, որը անհերքելիօրէն ապացուցում է, որ Մարմատեցու առաքելութիւնը միայն եւ միայն քաղաքական նպատակ ունէր: Դա այն աղբրագիրն է, որ հայոց կաթողիկոսը ներկայացրեց Վենետիկի հասարակապետութեանը — պարսկական Հայաստանի հայ երեւելիների անունից: Աղբրագիրը վերջանում է այս խօսքերով. «Եւ մենք խեղճ հայքս ի մասին պարսից, ի ներքոյ խիստ տառապանաց այլադենից, կու սպասեմք ձեր գալուն, ինչպէս սուրբ նախահարքն սպասէին փրկչին Քրիստոսի: Գիտեմք, որ ի զգօնութենէ տէրանց Վենետաց պիտի սկսի մեր փրկութիւնն եւ ազատութիւնն: Կ'ուղարկեմք մեր Պատրիարքը Ստեփաննոս շատ պատճառաց համար, առ մեծապայծառ տէրութիւն ձեր, որ յարգութիւն ընծայէ ձեզ եւ յետոյ շնորհք ընէք իրեն, որ կարենայ երթալ եւ համբուրել զոտս ամենասուրբ Պապին» 1):

Անշուշտ, նման աղբրագրեր ներկայացը-

1) Հ. Ալիշան, «Հայ Վենետ», 1896 թ. եր. 329, Լէօ, «Հայկ. Տպագր. 1901, Ա. եր. 49:

րել էր նա եւ միւս արքունիքներում: Բայց դժբախտ կաթողիկոսի դիմումները մնացին ձայն բարբառոյ յանապատի: Եւրոպական պետութիւններից եւ ոչ մէկը չկամեցաւ օգնութեան ձեռք մեկնել բարբարոսութեան ճանկերում խողխողող հայ ժողովրդին: Անգամ բոլոր աշխարհի տառապողների անունից խօսող եւ արքայութեան բանալիները իր ձեռքում բռնած Պապը մատը մատին չխփեց:

Այնուհետեւ նոյն քաղաքականութիւնը որդեգրեց նաեւ իր աթոռակիցն ու յաջորդը՝ Միքայէլ Սեբաստացի կաթողիկոսը: Սա եւս ժամանակի դառնութիւններից յուսահատ, գուցէ եւ քաղաքական նոյն նպատակով Արեւմուտք անցնելու մտադրութեամբ՝ գնաց Սեբաստիա: Բայց չկարողանալով անձամբ աւելի առաջ գնալ, ուղարկեց մի պատգամաւորութիւն դէպի Հոովմ, երեք հոգուց բաղկացած — Արգար դպիր Եւզոկիացի (Թոխաթցի), որդին՝ Սուլթան եւ Աղէքսանդր անունով մէկ քահանայ (1562 թ.): Տուեց նրանց մի նամակ եւ ընծաներ Պապին տանելու:

Անցաւ ամբողջ մէկ տարի եւ սակայն կաթողիկոսը ոչ մի լուր չունէր պատգամաւորութեան մասին: Անգամ չգիտէր՝ նա տեղ հասե՞լ է, թէ ոչ: Ուստի յաջորդ տարին գրում է մի նամակ եւս Պիոս Գ. Պապին, նամակի սկզբում գնելով ինչ որ խորհրդաւոր նշաններ (ծածկագիր), որ միայն Արգարը կարող էր վերծանել:

Նամակի մէջ, սովորական քաղաքավարական արտայայտութիւններից յետոյ, բացատրում է, թէ ինչո՞ւ աւելի հանգամանօրէն եւ բաց կերպով չի կարողացել գրել. որովհետեւ — ասում է — «ոչ միայն արտաքին թշնամու, այլ եւ չար քրիստոնեաների երկիւղից» — «ձեռք մեր ամփոփեալ են եւ լեզուք մեր կարկեալ ի մէջ այլակրօնից»: Այդ պատճառով խնդրում է ընդունել Արգարին — եթէ հասել է տեղ — որպէս իր ներկայացուցիչը եւ նրան լըսել, «նա ինքն եղիցի որպէս բերան մեր»․ որից յետոյ յոյս է յայտնում, թէ շուտով իրենց ազատութիւն կը ծագի Պապի շնորհիւ՝ «ընդ հուպ ակն ունել ազատութեան ի գերութենէ աստի» (Չամչեան, Գ. եր. 519-520):

Կարծում ենք՝ կրկին անվիճելի է, որ Միքայէլ կաթողիկոսի այս նամակն էլ — ինչպէս նաեւ Արգարի պատգամաւորութիւնը —